

佛說十號經

宋三藏法師天息災奉詔譯

如來應供正等覺明行足善逝世間解無上
士調御丈夫天人師佛世尊阿難白言云何
如來佛告苾芻我昔因地爲菩薩時歷修衆
行爲求無上正等正覺今得菩提涅槃一切
眞實以八聖道正見所證名爲如來如過去
正等正覺調伏息心得至涅槃故名如來云
何應供佛言昔在因位所行善法威儀戒品
十善根力修令增長如是修習圓滿至究竟
位證涅槃時斷盡一切煩惱令身口意清淨
無染求害煩惱如斷多羅樹頭永不生芽復
次貪瞋癡等煩惱盡故一切諸趣永不結生
超過四難生老病死苦果之法感苦二種而
永不生立應供號復次令彼世間所有衣服

卧具飲食湯藥幢幡寶蓋香花燈果及天上
人間最上之物供養於佛獲得最上富貴吉
祥之福是名應供之號云何正等覺佛言如
來具一切智於一切處無不了知以四念處
四正斷四神足五根五力七覺支八聖道十
二緣生四諦法等如是之法平等開覺一切
衆生令起智斷惑證須陀洹果斯陀含果阿
那含果阿羅漢果三明六通復於大乘作意
思求歷修諸地斷盡結習成無上覺此名正
等正覺云何明行足佛言明謂天眼明宿命
明漏盡明行足者爲如來身口意業善修滿
足正眞清淨如有大衣鉢等自在觀照而無
愛著於自願力一切之行修令滿足號明行
足云何善逝佛言即妙往之義如貪瞋癡等
引諸有情往彼惡趣非名善逝如來正智能

斷諸惑妙出世間能往佛果故名善逝云何
世間解無上士佛言世間者謂欲界色界無
色界地獄餓鬼傍生等類各具色蘊受蘊想
蘊行蘊識蘊眼根耳根鼻根舌根身根意根
及彼六識所緣境等一切諸法名曰世間正
覺正知名世間解又彼世間所有二足四足
多足無足欲色諸天有想無想非有想非無
想若凡若聖一切有情之中唯佛第一最上
無等名無上士云何調御丈夫佛言佛是大
丈夫而能調御善惡二類惡者起不善三業
而作諸惡墮地獄餓鬼傍生而得惡報善者
於身口意而修衆善得人天福果此之善惡
皆由心作佛以第一義善涅槃之法顯示調
御令離垢染獲得最上最滅涅槃是故得名
調御丈夫云何天人師佛言非與阿難一苾

芻爲師所有苾芻苾芻尼烏波塞烏波夷及
天上人間沙門婆羅門魔王外道釋梵龍天
悉皆歸命依教奉行俱作佛子故名天人師
云何名佛智慧具足三覺圓明是故名佛佛
告阿難我昔經行之次有婆羅門而來問我
何故汝之父母爲汝立名呼爲佛耶佛即答
言世所知者我能了知世所觀者我亦能觀
所得滅者我亦得滅我具一切智一切了知
我從無數劫種種修行遠塵離垢今得無上
菩提故立佛號云何世尊佛言我於因地自
審觀察所有善法戒法心法智慧法復觀貪
等不善之法能招諸有生滅等苦以無漏智
破彼煩惱得無上覺是故天人凡聖世出世
間咸皆尊重故曰世尊
佛說十號經